

Date – 19/03/2026

Time - 7:30 -7:40 Hrs

AKASHVANI AIZAWL

## REGIONAL NEWS BULLETIN

### HEADLINES (MORNING)

1. Chief Minister Pu Lalduhoma hovin Mizoram Pro - Active Governance & Timely Implementation thukhawm chuan Sairang atanga Thenzawl rel kawng kalna tur chu chinfel thawkhat a nih thu tarlan a ni.
2. Tourism Minister Pu Lalngthinglova Hmar chuan Mizoram nuam tak chu thawnthu mawi tak sawi chung zelin khawvel ram zau zawkah tarchhuah tumin hma an la tih a sawi.
3. Union Cabinet chuan ramchhung hmun hrang hranga plug-and-play industrial park 100 tihchangtlunna tur Bharat Audyogik Vikas Yojna a pawm
4. Prime Minister Narendra Modia chuan nimin khan telephone hmangin Kuwait Crown Prince Sheikh Sabah Al-Khaled Al-Mubarak Al-Sabah biain West Asia boruak inlumlet mek a sawipui.

<><><>

### PRAGATI

Chief Minister Pu Lalduhoma hovin Mizoram Pro - Active Governance & Timely Implementation (Mi-PRAGATI) thukhawm chuan Sairang atanga Thenzawl rel kawng kalna tur chu chinfel thawkhat a nih thu tarlan a ni.

Thutkhawmah hian Sairang - Thenzawl rel kawng survey chungchang sawihon ah Railway thuneituten Thenzawl thlenga rel line kalna tur hi chinfel thawkhat a ni an ti a, heng bakah hian Vairengte - Aizawl inkar 4 lane hnathawh mekah meeting hmasaa sawi lan electric power line sawn chungchang chu chinfel a nih tawh thu tarlan a ni a. He 4 lane kawngpui laih mek hi kilometre 90.110 a thui tur a ni a, heng zinga kilometre 60.295 chu Greenfield Alignment tura duan a ni. PM SHRI (Pradhan Mantri School for Rising India) Scheme kalpui mekah Mizorama sorkar school 35 te chu PM SHRI kalpuina atan thlan an ni a, thawh ruk (6 phase) a kalpui tur niin a thawhkhatnaah school 22 ah hmalak a ni a, PMJVK hnuaiyah hian Mizoramah project 104 approved tawh a ni a, an zinga 84 chu thawh zawh tawh niin, thawh mek 18 a awm a. Sanction beisei mek a awm nual bawk.

Vawiin thutkhawmah hian Aizawl Western side By-pass Road laih mek te, NHIDCL hmalakna te, PM SHRI Scheme hmalakna te, PMJVK hmalakna te leh Railways hmalaknate an thlirho a. Aizawl Western side Bypass hna hi zaa 19. 56 thawh tawh a ni a. Kawngin paltlang rama khawsa raltlante sawn dan tur te, mimal quarry neituten zangnadawmna an phut chungchang te, kawng laihein a nghawng huan thlai chan te zangnadawmna te, forest clearance leh leivung paihna chungchanga harsatna awm mek te an sawi a ni.

*Mizoram Pro - Active Governance & Timely Implementation (Mi-PRAGATI) hi state chhunga hmasawna hnathawh lian zual te vil a, harsatna an tawhte chin fel dan dappuitu tur leh a tul anga department hrang hrang thawhhona tichak tura din*

*a ni a. Mipuite tana rawngbawlha tam zawk, langtlang leh rang zawk kalpuina tura ruahman a ni.*

<><><>

## MSPMC

Mizoram State Project Monitoring Committee chuan nimin khan Lunglei khawpui tuiin tur a chawmna tur, Pialthleng Concrete Gravity Impounding Dam khuah mek an tlawh.

MSPMC Secretary Pu Lalthanzuala chuan hnathawh thalo ngawt zawng chhuak lovin harsatna an neih dan leh a chinfel dan kawng inkawhhmuh thin a kal an nih thu sawiin Tlawng lui khuah mek chu Lunglei mipui tan anih avangin a hun takah tha taka zo tur in an duh tih a sawi.

Tuikhuah thuk zawng hi metre 13 niin tui chim chin tur hi metre 12 a ni a, km 1.360 a thui li tur a ngaih a ni. Tui tling tur zat hi ML 240 a ni.

<><><>

## TOURISM MINISTER

Tourism Minister Pu Lalnghinglova Hmar chuan Mizoram nuam tak chu thawnthu mawi tak sawi chung zelin khawvel ram zau zawkah tarchhuah tumin hma an la tih a sawi.

Nimin khan Bana Kaih hnuaiia ‘District Level Tour Guide’ training buatsaih chu ‘State Institute of Rural Development and Panchayati Raj (SIRD&PR), Durtlangah Tourism Minister hian a hawng a, Tourism Department in hma a sawn zel chu lawmawm atih thu a sawi.

Pu Lalnghinglova Hmar chuan Tourism Department chu Mizoram Department zinga budget tlem leh te ber pawl ni mah se, eizawmna zahawm thahnem tak siam thei turin ke a pen mek a ti a, Mizoram nuam tak chu thawnthu mawi tak sawi chung zelin khawvel ram zau zawkah tarchhuak turin theitawp an chhuah tih a sawi.

Minister chuan Tourism an tuipei vanga training a telte chu a ngaihlu hle a ti a, Tourism Sector chu eizawmna zahawm tak a nih theih nan theitawp chhuah tlan a ngai tih sawiin Mizoten hnamdangte an lo chhawn dan chu chhuanawm atih thu sawiin Tour Guide tha tak ni thei turin trainee te chu an theihna leh thiamna te Mizoram hmasawmna atan hmang turin a fuih a ni.

Tour Guide te tana training chu Tourism Department in khualzinte mumal zawk a enkawl an nih theih nan a duan niin, mi 110 training tura ruahman a ni a. Tun hi a batch hmasa ber niin mi 40 an tel phawt dawn a. batch dang pahnih la awm tur a beisei a ni.

Tourism Department Deputy Director Pi Rachel Lalrinhlui chuan Technical Report pe in, training dil zingah beisei aiin Aizawl District pawnlam an tlem deuh tih a tarlang a. Hlawhtling taka training chhuak te chu Tourism Department atangin Provisional Certificate kumkhat chung atan pek an nih tur thu leh, a hnuah kum 2 atan register an nih theih tur thu a tarlang a. Kum 2 hnuah pawh an tihthat dan azira renew zel theih tur a nih thu a sawi a ni.

<><><>

## SEC DECLARES DATE OF AMC ELECTION

Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.

Mizoram State Election Commissioner Dr. H. Lalthlanglana chuan nimin khan a pisa-ah chanchinbu mite kawmin AMC inthlan chu April ni 21 ah neih tur ani a ti a, vote hi zing dar 7 atanga tlai dar 5 thleng thlak tura ruahman ani tih sawiin AMC inthlan a din tumte tan a hming pek luh theih ni hnukung ber atan tun thla March ni 26 an ruat thu leh candidate inhnuk dawk duhte tan a inhnudawhna ni hnukung ber chu tun thla March ni 30 a nih thu a sawi bawk.

Mizoram State Election Commissioner chuan inthlan that ngaih palh a awm thu hla-ah, April ni 23 chu inthlan thatna neih ni atan an ruahman thu a sawi a, AMC inthlan a vote tla te chu April ni 27 zing dar 8 atanga chhiar tan a nih tur thu leh, inthlan kaihnawih zawng zawngte chu April ni 30 a zawh fel vek tura tih a nih thu a sawi bawk.

Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung a ni.

<><><>

## CM CONDOLES

Chief Minister Pu Lalduhoma'n nimina thi Kolasib DC Pu Robert C. Lalhmangaiha chu ram tana thawkrim leh mi tlawmngai ani a ti a, a kalsan tak a nupui fanaute a tawrhpu takzet tih a sawi.

Pu Lalduhoma chuan Zawlnuam pana a kal laiin Kolasib DC Pu Robert C. Lalhmangaiha'n a boralsan tih a hria chuan a thawng hle a ti a, Officer tha, taima leh inpe zo an chan chu Pawi atih thu a sawi.

Chief Minister chuan tun hnaia Kolasib district tum hnih a tlawhna ah Pu Robert C. Lalhmangaiha chuan a tawiawm tha thin hle a ti a, Ram tana thahnemngai leh thawkrim Mi chhuanawm tak a ni tih sawiin Ram tana a inpekna zawng zawngah lawmthu a sawi a, a kalsan tak a nupui fanaute Pathianin thlamuan zel se tiin thlahna thu a social media account kaltlangin a sawi a ni.

*Kolasib bawrhsap hian taksa lam harsatna neuh neuh neiin, tun Pathianni march ni 15 khan a nawmsam loh zual avangin Aizawlah a lo haw chho a, a nupui Pi Lalbiakhlui leh a fate pathum a kalsan a ni.*

*Pu Robert C. Lalhmangaiha hi nikum hmasa 2024 Aizawl West II Presbytery Chawlhmun North Kohhran a nghah-ah khan Chawnpui Kohhran Upa tana nemngheh a ni a, chawhnu dar 1:00 hian Chawnpui Presbyterian Kohhran Biak Inah vui a ni ang a, Chawnpui thlanmual ah phum a ni ang.*

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KVK KHAWZAWL

Krishi Vigyan Kendra, Khawzawl leh Indian Council of Agricultural Research (ICAR) bakah National Research Centres ICAR-NRC Grapes, Pune tangkawp chuan nimin khan Hnahlan khua-a Grape chingtute hnenah kalin zirtirna an pe.

KVK Khawzawl-a Senior Scientist Dr. Malsawmkimi chuan tunlai khawvel thang zelah Kuthnathawktuten hma an sawn a tul zia leh Grape tharchhuah te tun aia hlawk zawka thar thei tura theihtawp chhuah a tulzia sawiin tunlai thiamna hman tangkai a pawimawh thu a sawi a, kuthnathawktute chu hmasawn tum zel turin a chah a ni.

KVK Khawzawl-a Steel Melt Shop Dr. Lalngaihawmi chuan rannung eichhetu laka grape ven dan tur leh natna hrik laka venna tur leh an grape than duhna tur vitamin chungchang te zirtirna a pe a, Hnahlana khua-a grape chingtute hian an grape chawr rual lo hi an harsatna ani tel thin a, a chawr rual theih dan tur KVK-a thawktute hian zirtirna an pe a ni.

He hunah hian kalkhawmte hnenah grape enkawlna atana leitha, rannung thahna hlo leh natna enkawlna tur bakah vitamin te an pe chhuak nghal a ni.

KVK Khawzawl hian Tribal Sub Plan hnuaiah Hnahlan leh Chawngtlai khuaa grape chingtute hnenah tun aia hlawk zawka an tharchhuah theih nan theihtawp an chhuah mek a ni.

<><><>

UNION CABINET

Union Cabinet chuan ramchhung hmun hrang hranga plug-and-play industrial park 100 tihchangtlunna tur Bharat Audyogik Vikas Yojna a pawm. He scheme atan hian cheng vaibelchhe sang 3 sang 3 leh 660 ruahman a ni a. Union Information and Broadcasting Minister Ashwini Vaishnaw sawidanin ramchhunga industry hmasawna ruhrelte khawvel huap pawha a tha ber pawla siam a ni dawn a. Thilsiam chhuahna lama an theihnate tichangtlung tur leh ram hmasawna nawrkal tura an theihna siam a tum dawn a ni.

Hei bakah hian sawrkar chuan Cotton Corporation of India tan Minimum Support Price (MSP) cheng vaibelchhe 1718 pek a remti bawk a. Kum 2026-27 atanga 2030-31 chhunga Small Hydro Power Development Scheme atan cheng vaibelchhe sang 2 leh 584 a pawm bawk tih Pu Vaishnaw chuan a sawi bawk a ni.

<><><>

PM

Prime Minister Narendra Modia chuan nimin khan telephone hmangin Kuwait Crown Prince Sheikh Sabah Al-Khaled Al-Mubarak Al-Sabah biain West Asia

boruak inlumlet mek a sawipui. Social Media ah he thu hi tarlangin Pu Modia chuan India chuan Kuwait beih a ni leh mahnia thuneihna nei ram anihna palzut a ni chu a dem a ti a. Strati of hormuz-a him leh tluang taka bungraw phurhkual theih chu a ngaih pawimawh ber a nih thu a sawi a. Inbiakna tha tak neia remna leh muanna siam thuai chu India leh Kuwait te duhdan anih thu a sawi bawk a ni. Pu Modia chaun Kuwait-a India mite himna tura Crown Prince in hma alakna zawng zawngah lawmthu a sawi bawk a ni.

